



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tiryimym@aolima



tir yimym

TAPAK 8

Ukraine-i asendshir Crimea nung tesem balala makdar

Asian Shooting Championships: Aishwary Tomar-i gold medal angu



VOL. XXI NO. 25 (ADOK 25) DIMAPUR YANGTEPNÜ (THURSDAY) YIMPOKSÜI (NOVEMBER) 02, 2023 ₹ 5.00

Nagaland nung APAAR mapa meinyaktsüla: NSF

Dimapur, November 1, 2023 (TYO): Naga Students' Federation (NSF)-i Nagaland nung Automated Permanent Academic Account Registry (APAAR) magizüker ta shia Chief Secretary dangi shidi ka zülüogo.

Department of School Education (DoSE)-i October 16, 2023 nü Nagaland nung 'One Nation, one student ID' ta ajaba APAAR mapa inyaktsü osang sangdongba magizüker kechiyong APAAR ya kaketshirtem temeten aser taküm atema lendong lir aser shisaliok rejutem asoshi nungdak maliba khuret ka lir, ta NSF-i ashi.

National Educational Technology Forum (NETF)-i ashiba agi Aadhaar ID liaka APAAR ajanga kaketshir shia nem pre-primary nungi higher education tashi unique identification number ka agütsütsü. Sorkaribo iba inyakyim ajanga kaketshir ka shisaliok nung renloka aoba aser ajangzükta metettsü ta ashir saka iba inyakyim dak tebilemstü aika keta aliba jembir, ta NSF-isa ashi.

Aadhaar nunga data security aser privacy asoshi tebilemstü

aika aliba mapang ka APAAR ajanga kaketshir nem lendong bentsür arutsü ana nung lir. Ano Nagaland nung shisaliok rejutem ketdangsubaren tsütsü teinyaktsü aika lir aser iba nung APAAR registry mapa tenzükra tesayurtem aser staff khuret tuluba akümstü aser shisaliok jenjang mejungi akümstü ta NSF-isa Nagaland Chief Secretary dang shiogo.

APAAR enrolment atema tsüraburtem dang nungi temelaba meshiba jagi kakshirtem rights aser privacy kümzuka ayutsü makok. Sorkaribo data ji sorkar agencies den dang lemsatepsü ta ashir saka tim mesüi amshitsü lenmang lir. Ano District Information for Education portal ji cyberattacks asütsü akok aser iba ajanga kaketshir indang nija osang tangari metettsü, ta NSF-isa ashi.

Anungji APAAR maparen indang jungjunga mejembitep tashi department-i Nagaland nung iba mapa meinyaki atatsü takhangba agütsür. Maneni shisaliok rejutemia iba mapa ya kechi südir inyaktsüla ta kaketshir aser tsüraburtem nem tetuyuba magütsütsüla ta NSF-isa metetdaksü.

Nagaland ya rongsenketzung ajanga dang renloktsü: Hekani Jakhalu

Kohima, November 1, 2023 (TYO): Nagaland inloktsü süra rongsenketzung inloktsüla ta Industries & Commerce Advisor Hekani Jakhalu Kense-i ashi.

"Centre sorkari state receipt ama Rs 896 crore agütsür aser iba nungi itasen nung Rs 748 endoker, debt services atema Rs 107 crore aser power alizüktsü atema Rs 42 crore endoker" ta Hekani-i ashi.

Iba jagi state sorkari Rs 147 crore shi kati meperir anungji shishilembaba ajanga dang "Nagaland rongsenketzung

renloka aotsü. Lanurtemi dokan tilatem lapoka shishilembaba mapa inyaka tejakleni aotsüla" ta lai ashi.

Kohima jila nung KAK (Ketu and Kris) küm 30 ajungba indang sentong nung jembidang Advisor Hekani-isa "Nagaland inloktsü süra rongsenketzung inloktsüla" ta ashi.

KAK ya Naga nung shishilembar rongnung mezünpurtem lir kechiyong iba mapangji retail stores teimbaka non-Naga nungeri dang lapoka liasü ta laisa ashi.

Nagaland nung gari kiburtemi election para meshir

Dimapur, November 1, 2023 (Agencies): November 3, 2023 anepdang 5:00 ako nungi Mokochung, Tuensang, Zunheboto, Longleng district tem nungi All Commercial Vehicle Owners' Associations aser Phek (ANTA) aser Peren (ANTA) tem ajanga mapang telatet makai Chakka Bandh tenzüktsü sangdongogo.

January nungi October 2023 tashi bills magütsüba atema parnoki iba lemtet agi. 2023 NLA Election mapang commercial fares agüjang ta parnoki takhangba agütsür.

Parnok nem sen agütsütsü aliba magütsü tashi "Chakka Bandh" magientsü, ta

Commercial Vehicle Owners' Associations-i metetdaksüogo.

Commercial Vehicle Owners' Associations-i iba atema aiben jembia aruogo aser June 22, 2023 nü temepishiba shidi ka zülü aser September 28, 2023 nü Nagaland sorkar nem anogo tenet züngzüktsü saka telangzüba kecha mali ta parnoki ashi.

Peren aser Phek (ANTA) den district 4 nungi Associations-i October 9, 2023 nü "Chakka Bandh" alitsü sangdonga liasü saka Nagaland sorkari October 31, 2023 tashi nung senotsü magütsü aliba agütsütsü nangzuka mepishiba ajanga iba sentong athi.

BAF-i 1971 Liberation War bilemteta Dimapur semdang



October 31, 2023 nü Bangladesh Air Force (BAF) teshimtet telok kati Dimapur, Nagaland semdangdang agiba noksa ka angur.

Dimapur, November 1, 2023 (TYO): Bangladesh Forces sepaitem dak Liberation War tanüla alitsü atema Bangladesh Air Force (BAF) teshimtet telok kati October 31, 2023 nü Nagaland kübok Dimapur nung of Bangladesh Air Force Raising Day benjung mongogo.

Group Captain Tanvir Marzan-i anir BAF ketdangsur aser sepai 20-i Nagaland semdang.

"Bangladesh Air Force (BAF) ya September 28, 1971 nü Dimapur nung Chetak ka, Armed Otter ka aser Dakota ka, ketdangsur 9 aser nisung 57 ajanga tentet" ta Eastern Air Command of Indian Air Force-i

sangdong ka nung ashi.

Iba anogo nung pilot asem-Squadron Leader Sultan Ahmed aser Flight Lieutenant Badrul Alam (Pakistan Air Force nungi jena aruba) aser civilian pilot Captain Shahabuddin Ahmed nung Indian Air Force (IAF) ajanga training agütsü tenzük. Iba ya mezüngbuba Bangladesh Air Force (BAF) unit ta züngshir.

December 16, 1971 nü Bangladesh linük akümbe sülen injang agi khasar aliba Kilo Flight tayimtsüji India-i Bangladesh ket nung agütsü.

Iba mapang India sorkari Dacota ka, Otter ka aser Alouette-III Helicopter ka Kilo

Flight-i amshitsü atema sempet agütsü. 1971 küm Liberation War mapang Pakistan Air Force nungi jena arur Bengali ketdangsur aser airmen-i Dimapur nung air operations aika takok ngua agia liasü.

Dimapur semdangi aruba teshimtet telok ya BAF Base Bangabandhu, Dhaka nungi Bangladesh Air Force Air Vice Marshal Hasan Mahmood Khan ajanga apusoa yoka liasü.

"Iba ajanga linük ana Air Forces tsüngda tesentaktep takang aliba sayur aser Bangladesh nüjiso anguba rara nung IAF-i shilem agiba agizüker" ta Defence spokesperson Lt Col Amit Shukla-i ashi.

tEA-i yimdong nung yokyayokjiba tetsür nem QR code agütsü



November 1, 2023 nü Entrepreneurs Associates (tEA)-i Sokhrieze Market, Kohima nung QR codes alemba sentong nung agiba noksa angur.

Kohima, November 1, 2023 (TYO): Entrepreneurs Associates (tEA)-i Bodbarñü Sokhrieze Market, Kohima nung women street vendors 26 nem QR codes lema agütsüogo.

"Uplifting Women Street Vendors program" kübok tEA-i tetsür yokyayokjir nem QR codes agütsü.

"tEA-i Nagaland tesem ajungalen yimdong nung yokyayokjir tetsürtem tashi itdaksütsü atema tenangzükba nung inyaka arur. Parnok nem QR code agütsüba ya senotsü tezúbaba amshitsü aser digitalisation maparen nung parnok dendaktsütsü atema lir" ta tEA Operations Supervisor Chunjanglu Gracy-i ashi.

"Tetsürtem skills tajungba akümstüla aser tensa melenshiba den külemi anidaksüla. Taruba benjung mongpu tourist temi

Nagaland semdangdang tetsürtemi QRs amshiba ajanga tajangzük angutsü" ta Gracy-isa ashi.

"Tesüiba nung kü customers kar arur kecha malii dang ao kechiyong parnok ket nung sen bena maliasü aser kü ket nung QR code scanner mali. Saka tangbo QR code aliba ajanga ni aika yoktetsü" ta Soneinuo Metha-i ashi.

"Kü customers-i phone ajanga online payment asüandang network majungba ajanga timtem ajuru saka tangbo QR code ajanga parnok sen melamela agütsütetsü. Iba teyari atema ni teti tEA dang pelatsü" ta Asanuo Kerestu-ia ashi.

Ano, Anungla Longmisa-i ghonda ka tsüngda QR code ajanga Rs 700 yokzük aser iba sülen tatsüka dang lir ano Rs 100 yokzuka liasü.

Bodbarñü QR codes angurtemji Officers Hill, Red Cross, Upper Chandmari, South Police Market, Red Cross, South Point Market, New Ministers Hill, PR Hill, Bamboo Market aser Sokhrieze Market nungi tetsürtem liasü.

Uplifting Women Street Vendors Program ya tEA indang tongtipangba mapa lir aser iba ya October 2017 nung tenzük.

Tang tashi nung tEA ajanga Nagaland, Manipur aser Assam nung women street vendors 7000 nem training agütsüogo aser inyaksama aruogo. Parnokisa tanga North East state tem nunga mapa inyaktsü sentong lir.

2024 tashi nungbo women street vendors 10,000 tashi Uplifting Women Street Vendors Program ajanga tajangzük angutsü tEA-i imlar.

Nagaland Civil Secretariat Peons/MTS nem uniform agütsü



Home Commissioner Abhijit Singa IAS ajanga Nagaland Civil Secretariat nung peon aser MTS nem uniform lema agütsü dang tangokba noksa ka yangi angur.

Dimapur, Yimpoksüi/ November 01 (TYO): Home Department indang SAB Branch ajanga Commissioner indang office chamber nung November 1, 2023 nü sentong ka ayongzüka Nagaland Civil Secretariat indang peon aser Multi-Tasking Staff (MTS) nem Home Commissioner Abhijit Sinha IAS ajanga uniform agüja liasü. Iba sentong nung Abhijit Sinha ajanga Secretariat nung

peon aser MTS tem asoshi uniform kanga tongtipang aser iba ya ajanga yimya tajungba kuma mapa shidak inyaktetsü ta ashi.

Item uniform ya angati agütsür aser Secretariat nung inyakba peon aser MTS ajungai office mapa inyakba mapang teti asemtsü imlar, ta pai ashi.

Iba uniform ajanga office peon temi mapa tali angateta inyaktü imlar, ta Home Department indang SAB Branch nungi Section Officer Asela Sangtam-i ashi.

Uniform agütsüba atema Grade IV Association indang tatong tir Yangtrali Sangtam-i Home Department dang pelaba lemsatapa liasü.

Item uniform ya ajanga Secretariat nung inyakba staff tem mela-mela jangjatetsü ta pai ashi.

Nagaland Municipal Bill 2023 asadangtsü committee senden amentsü

Dimapur, Yimpoksüi/Nov. 01 (TYO): Nagaland Municipal Bill, 2023 asadangtsü asoshi November 2, 2023 anepdang 11:00 ako nungi tenzüka Rhododendron Hall, Police Complex, Chumoukedima nung senden amentsü, ta Deputy Chief Minister aser Convenor, Select Committee for the examination of the Nagaland Municipal Bill, 2023, T.R. Zeliang ajanga sangdong ka nung metetdaksü. Iba senden nung Committee züingsem ajak medema arua dena Nagaland Municipal Bill, 2023 dak sendakba ken o jembitsü ayongzüker, ta sangdong ajanga ashi.

Dimapur nung tanur ana nguteta lir



Dimapur, Yimpoksüi/Nov. 01 (TYO): Childline Dimapur ajanga December 20, 2021 nü Pantaloons showroom, Dimapur anasa arishi küm pezü tanur Madan aser June 20, 2022 nü Rail Bazar Dimapur anasa arishi küm 2-3 tsüingta tetsür chanu ka nguteta liasü.

Iba tanur ana ya tang Child Welfare Committee (CWC) Dimapur kübok lir.

Osang kaket balala nung sangdong aiben agüjaka nisung shinga tanurtem kibur kuma maru. Anungji onokitanur indang tsürabor/kinunger/kin sanger mesüra tanur ana meteta alirtem dang arua anogo 30 tsüingta tanur anizüker aotsü ayongzüker, ta Child Welfare Committee sangdong ka ajanga ashi. Iba sülen tanur ana ya adoption asoshi 'legally free' sangdongtsü. Iba tanur ana indang osangtsüsang meteta aliba tsürabor/kinunger aser nürburtemi 7085973615 / 9362358230/6909005712 den tongteprateptsü akok mesüra District Child Protection Office, Dimapur nem osang agütsütsü akok, ta sangdong ajanga ashi.

Tanü state tesem ajungalen Mock Drill agitsü

Dimapur, Yimpoksüi/Nov. 01 (TYO): Nagaland State Disaster Management Authority (NSDMA), Home Department ajanga November 2, 2023 nü state tesem ajunga nung Nagaland Emergency Preparedness Exercise (NEPEX) mock drill agitsü. Iba exercise ya menoknok magnitude 7.1 anokba ama agitsü. Ajungben alimar lendong atalokdang state renema aliba asadangtsü asoshi iba exercise ya agitsü.

PHQ nung anepdang 9:03 ako nung siren bell atemtsü aser iba sülen drill nung shilem abiba emergency vehicles temia siren amshitsü. Anungji nürburtemi tsüboa mebilemi amalitep akatsü ayongzüker, ta sangdong ka ajanga ashi.

Dimapur Government College nung 'Drinking Water Facility' yanglu



Dimapur, Nagaland, India WP32+PXR. Oriental Colony, Dimapur, Nagaland 797113, India

Dimapur, Yimpoksüi/Nov. 01 (TYO): Dimapur Government College nung tang mezüingbuba Dimapur Government College Students' Union (DGCSU) ajanga "InnoBuild Project" nungja agütsür Drinking Water Facility ka yanglua November 1, 2023 nü Administrator, Dimapur Municipal Council, W. Manpai Phom-i semzüjkja liasü.

Iba inyakyim indang osang agütsüba mapang DGCSU tongti zülur Rendemo C. Tsanglao-i ashiba agi, "InnoBuild Project" ya ojang ana 'Innovation' aser 'Building' nungi agizükba lir.

Ibai kaketshir temi anir ki o jen yangluba sentong ka lir. Iba ya ajanga kaketshirtem ya temelenshi bener arudaktsür ka-ka kumdaaktsür, ta pai ashi.

Ibai Students' Council nungi project ka kisüing masü saka kaketshirtem ajunga lungjemer inyakba project ka lir, ta Tsanglao-i ashi.

Academic tsütsü kija masü saka ki o jen tsütsüa DGC ya tajungtiba college kumdaaktsütsü nükjidong nung item amala maparen ya inyaker. Iba ya ajanga nürburtemi government

college tem nema lua bilemba aser angatetba melenshidaktsütsü, ta pai ashi.

Iba yagi kaketshirtem ya college nung kisüing masü saka loktiliba nunga temeleni bener arudaktsür ka-ka ama sayur. Langka mapa tulu kar inyaktü asoshi kaketshir shinga kanga tanurbo masü aser college ajanga nung mapa tajung inyaktüla, ta pai ayongzüka liasü.

Project Incharge, Mhonian Lotha, MD, Woodpecker, Landscaping & Interior Designing Dimapur ajanga iba project indang tatsü agi rat3eta ashi.

Kaketshir nem tenüingsang agütsüba mapang, iba project ya otsütsütsü lir, ta DGC Principal, Prof. Sanjay Sharma-i ashi.

DGCSU ajanga iba mapa inyaktü lemetetba aser kaketshir temi anir 'InnoBuild Project' inyakba atema pai tenüingsang agütsü aser küm shia iba 'InnoBuild Project' inyakba ajanga DGC tali tajungba akumtsü, ta pai ashi.

Iba Project semzüksüba sülen tetushi tesemdang ama adensang, DMC Administrator,

W. Manpai Phom-i DGCSU nem tenüingsang agütsü aser iba facility ya kaketshir nungdakba nung amshitsü imlar, ta ashi.

Iba project ya ajanga plastic pollution nungia kumzüksü, kechiaser tajemtsü tzü ataba tesem maliba ajanga nürburtemi khen amshiba tzü bottles tem bener jajar aser pei temeket menentsür, ta pai ashi.

InnoBuild Project kübok DGCSU ajanga Drinking Water Facility yangluba ya Plastic Free Dimapur asoshi mera ka ama asütsü, ta pai ashi.

DMC ajanga Dimapur ya anogo 90 nung Plastic Free City kumdaaktsütsü meranga inyaker, ta DMC Administrator ajangasa ashi.

Iba sentong nung menden Dr. Vinyuhu Lhoungu, Coordinator, IQAC, DGC liasü, Sedevino Jakhalu, Assoc. Prof & HoD, Political Science Department ajanga sentong tenzüka sarasadem.

National Cadet Corps. of DGC ajanga sentong nung college anthem aten aser Dr. Vinyuhu Lhoungu, Coordinator, IQAC, DGC ajanga melepzüing o jembia liasü.

Mega mock drill atema Tabletop Exercise agi

Dimapur, Yimpoksüi/Nov. 01 (TYO): State ajunga nung November 2, 2023 nü Mega Mock Exercise on Earthquake Disaster agitsü aliba dak sendakba nung Kohima district asoshi Tabletop Exercise sentong ka Deputy Commissioner, Kohima indang Conference Hall nung November 1, 2023 nü agia liasü.

Iba Tabletop Exercise nung Deputy Commissioner, Kohima, Kumar Ramnikant ajanga stakeholder ajunga dang pei mapa jangja inyaktü aser iba maparen shidak atalokba ama inyaktü ayongzüka liasü.

Alimar lendong balala ajurudang telangzüba agütsütsü state renema aliba asadangtsü asoshi iba Nagaland Emergency Preparedness Exercise (NEPEX) ya ayongzüker.

DC ajangasa nürburtem dang siren ola angashidang tsüboa malitsü saka amalitep akatsü ayongzüka liasü. Superintendent of Police, Kohima, Bharat Laxman ajanga shilem agirtem dang iba exercise ya zübazülema magitsü ayongzüka liasü.

Assistant Manager NSDMA aser Nodal Officer for Kohima District, Theja Zao-i Mock Exercise aser Incident Response System indang tongmelang agi rasaa ashi.

Kohima district nung menoknok magnitude 7.1 anoker ama iba Exercise ya agitsü.

MKG nung Special Summary Revision senden amentsü

Dimapur, Yimpoksüi/Nov. 01 (TYO): E-Roll Observer, Commissioner and Secretary to the Government of Nagaland, Lhouchalie Viya, IAS-i Mokokchung semdangtsü aliba dak sendakba nung senden ka amentsü, ta Deputy Commissioner (DC) aser District Election Officer (DEO), Mokokchung, Thsuvisie Poji-i party ajak dang sangdong ka nung metetdaksü. January 1, 2024 ya qualifying date ama Special Summary Revision aliba dak sendakba nung iba senden ya November 14, 2023 nikongdang 3:00 ako nungi tenzüka DC, Mokokchung indang Conference Hall nung amentsü. Iba senden nung tsüinglanglen agüja aliba ketdangtsürtem adentsü metetdaksü: ADC Hq & ERO Mokokchung, All AEROs, BLOs of Polling Stations: 24/1, 24/2, 24/3, 24/4, 24/22, 25/1, 25/2, 25/3, 25/4, 25/5, 25/19, 25/20, 25/21, 26/1, 26/2, 26/3, 26/4, 26/5, 26/6, 26/14, 27/1, 27/2, 27/3, 27/24, 27/5, 27/6, 27/7, 27/8, 28/1, aser 28/2 aser Political Party shia nungi nisung ka-ka mesüra ana-na.

Maratha reservation atema Maharashtra sorkari mapang meshir



November 01, 2023 nü Solapur nung Maratha Kranti Morcha züngsemtemi Maratha reservation atema takhangba agüja Pune-Solapur Highway mokdangba noksa nung angur.

New Delhi, Yimpoksüi/ November 01 (Agencies): Maharashtra state nung Maratha nungertemi sorkar mapa aser shisaliok rejutem nung parnok nem menden shiteta yujang, ta takhangba agütsüba atema jembitsü asoshi Bodhbarnü party ajak senden amenba sülen Chief Minister, Eknath Shinde-i, party ajaki Maratha nunger nem reservation agütsütsü atema melungtepogo, ta metetdaksü.

Shinde-i, "Maratha nunger nem reservation agütsütsüla, ta ajaki melungogo. Reservation ji ozüng ka ajanga dang agütsütsüla. Tanü senden nung MLA 32 aden," ta metetdaksü.

Ajisüaka Maharashtra Chief Minister-i Maratha reservation atema longkak aitba mapang raraba aser kiojen rongdoksüba

tatalokbatem aitsü. Shinde-isa, Maratha reservation atema sorkar nem mapang agütsütsüla, ta ashi. "Ajak Manoj Jarange Patil dang lumia longkak aitba anenang ta mepishir," ta paisa metetdaksü.

CM Eknath Shinde-i party ajak senden nung nangzükba dak sendakba nung Maratha reservation atema lumia longkak aitsang, Manoj Jarange-i, onoki maneni longkak aitsü, ta ashi.

Jarange-i, "Parnoki (sorkar) tangsa reservation agütsütsü masü na? Kü dang ibaji dang shiang. Senden nung jembiba osang tejangja ni menüngdaker. Maratha nunger chirnurtem asür ajisüaka loktilibai ibaji memeteter," ta ashi.

"Nisung kari na majungba

indang jembibabo nai manganer saka asen chirnurtemi ajangshiba timtem atemabo nai mebilemtsür ma? Onoki reservation tesadang masü saka ajak aginer," ta paisa shisem.

Jarange-i, tanü nikongdang tashi nung telemteba magira pai tzü-a majemtsü, ta metetdaksü.

Chief Minister-i Eknath Shinde-i pa dang, lenmang kabosa bushitsü, ta nangzükba sülen ang Mongolbar nungi Jarange-i tzü-a ajemer.

Tamalen Jarange-i, pai anogo ananü tzü ajemtsü saka sorkari Maratha nunger nem Kunbi caste certificates agüja OBC jenjang magütsüra pai tzü-a majemtsü, ta metetdakja sorkar dang Maratha reservation atema jembitsü asoshi senden amentsü takhangba agüja liasü.

India nung gari lendong shilem 12 agi ano teimba kümogo

New Delhi, November 01 (Agencies): 2022 küm India nung gari lendong nung nisung asüba kanga teimba kümogo (shilem 9.4) aser yirurtema teimba kümogo (shilem 15.3); linük tesem ajaklen gari lendong atalokba shilem 11.9 agi teimba aküm, ta ketdangsertemi metetdaksü.

2022 küm gari lendong teimba atalokba yimtiji Delhi liasü aser tanabubaji Bengaluru liasü.

National Highways nung lendong teimba atalokba stateji Tamil Nadu liasü.

Ministry of Road Transport and Highways (MoRTH)-i, 2022 küm Bengaluru nung gari lenmang tila nung lendong 3,822 atalok aser item lendong nung nisung 772 asü; 2021 küm nungbo Bengaluru nung gari lendong nung nisung 654 dang asü, ta metetdaksü.

Kasa küm Bengaluru nung gari lendong nung nisung 3,189 asü.

Chennai nungbo gari lendong nung nisung asüba shilem 49 agi tajemba kümogo, kechiyong 2021 küm Chennai nung gari lendong nung nisung 998 asüba den medemdangra 2022 küm nungbo gari lendong nung nisung 507 dang asü, ta kasa osang ajanga metetdaksü.

Ajisüaka 2022 küm National Highways nung gari lendong nung nisung teimtiba asüba state jibo Tamil Nadu lir, kechiyong yaküm iba state nung gari lendong nung nisung 64,105 asü.

Yaküm India nung gari lendong 4,61,312 tashi atalok, aser item lendong nung nisung 1,68,491 asü aser nisung 4,43,366 yiru.

Yaküm India nung gari lendong atalokba kuli teimbaka gari kera aniba agi liasü, tanabuba nung yi jemer gari aniba aser tasembuba kuliji traffic ozüng alema gari aniba agi liasü.

Tir Droupadi Murmu-i Army Major ka mapa nungi anentsüogo

New Delhi, November 01 (Agencies): Linük Tir Droupadi Murmu-i Army Major kati security inyakyim alema inyakba atema mapa nungi anentsüogo.

Army major ji tri-service Strategic Forces Command nungi lir; iba Command yagi linük indang nuclear arsenal repranger.

Linük security tashi maittsüsa pai metokmeperi aika inyakogo, ta kuli bushitetba sülen linük Tiri sign süa army major ji mapa nungi anentsür.

Yaküm March ita nungi tenzüka Major anema

bushisüngdanga liasü. Pai pa indang electronic osettem nung kanga tongtibang documents yua liasü; ibaji sepaitem inyakyim alema lir. Iba denji külemi pai social media ajanga Pakistan nunger intelligence nung inyaker ka den tongtepratepa liasü, ta osang angazker.

Tamalen Strategic Forces Command-i board ka tenteta Major anema bushisüngdanga liasü. Pai melung malemstüsa inyakba, social media nung ozüng alema inyakba aser kanga tongtibang miim osangtem tangar den lemsatepba kuli bushitetogo.

Major indang phone meshia bushisüngdangba ajanga WhatsApp group ka nung sepai ketdangsertem, parnok kinüngtsürtem aser kibong züngsemtemi ozüng alema osangtsüsang lemsatepba putet. 'Patiala Peg' ta ajaba WhatsApp group ka nung ozüng alema inyakba jangjaba sülen Brigadier ka densema sepai 20 anema-a bushisüngdang tenzükogo.

Iba osang dak sendakba nung osangbenertemi Army tem den osang metetpela saka army temi osang tejangja lemsateptsü memelung.



November 01, 2023 nü Kolkata nung SUCI züngsemtemi Israel-i Gaza Strip amakba anema longkak aitba noksa nung angur.

Election jakdang opposition lenir ajak aputsü asalentong yanglur: Mamata

Kolkata, Yimpoksüi/ November 01 (Agencies): Bodhbarnü West Bengal Chief Minister, Mamata Banerjee-i, sangküm Lok Sabha election matongdang BJP-i aniba Central sorkari opposition lenirtem ajak aputsü aser 'linük tazüngla' nung parnoksa vote agütsütsü atema asalentong yanglur, ta tai tongloksü.

Trinamool Congress tongti lenir, Mamata-isa, Delhi excise policy ken o dak sendakba nung asüngdangyatsü atema Enforcement Directorate (ED)-i November 2 nü Delhi Chief Minister Arvind Kejriwal jaokogo aser lenir aika nem-a tejaokba agüja lir, iba denji külemi opposition MP tem indang phone 'hack' süogo, ta metetdaksü.

Mamata Banerjee-i Centre sorkar dang West Bengal nem tagütsütsü aliba MGNREGA fund agüjang, ta metetdaksü. Lar party-i iba senji November 1 tashi nung agüjang ta takhangba agüja aliba ano November 16 tashi

atsülangtsüogo. State secretariat nung osangbenertem den jembidang lai, "Sangküm (Lok Sabha) elections jakdang parnoki (BJP) opposition party tem ola nembangtsüner. Parnoki linük tazüngla nung vote agütsütsü atema election matongdang opposition lenirtem ajak aputsü atema asalentong yanglur. Parnoki asalentong ka yangludar," ta metetdaksü.

State nem tagütsütsü aliba MGNREGA fund dak sendakba nung lai ashiba agi, state Angh CV Ananda Bose-i pai iba atemaji Centre den jembitsü ta nangzükogo.

"Tatembangbuba anogoji tanü liasü, saka tang tashi kecha masür. November 16 tashi nung MGNREGA sen magütsüra onoki maneni telemteba agia inyaksü," ta lai ashi.

November 15 nü Trinamool Congress-i Netaji Indoor Stadium nung senden ka mena MGNREGA dak sendakba onük nung telemteba agitsü, ta laisa shisem.



November 01, 2023 nü Mumbai nung Maharashtra Chief Minister Eknath Shinde, Deputy Chief Minister Devendra Fadnavis, NCP Tir Sharad Pawar aser MLA tem party ajak senden nung adenba noksa nung angur.



TIR YIMYIM YIMOBILEM (EDITORIAL)

DIMAPUR YANGTEPNÜ, YIMPOKSÜI (YIMPOKSÜI) 02, 2023

Apu o lenmang na majung !

Nagaland nung gari lenmang o apu na majungba dak alaka tzü alia ajemer aser light-a junga marur, saka Nagaland nung benjongbentsübo junga amonger, anungji asenok makaba aser timtemba ajak amaa taküm-a Kisama nung hornbill benjongbo amongtsü bilema lidi. Lenmanga nübortem lenmang aser apuja nübortem jajatsü temtsüba, anungji khen yanglua yutsükaji nübortemi parnoksa anepalutsü teimla nung department-i toktsü amai lenmang aser apu aika tokja lir. Ibayongji, aiben item lenmangtem nungjibo NST bus aser Sumo taxi amala nung nübortem mener jajar masü saka nübortemiang bus aser sumo garitem nungger jajaba angur. Atangji, Naga nungertembo item ama mapa nungji dang jangra-atemer, iba jagi election nung lenmang aser apu yanglushitsüba sen ajak jelia meshia chir pelatepa lishitsüng nung gari nungger jajar südi. Aji oda, Nagaland nung yimti ajak dang tuluba aser Nagaland süngküm, Dimapur yimti nunga akhidang atemba apu techireper dang lir, saka meyanglushir. Khenbo yanglushitsü amai ka sayua, iba apu paidoka garitem jajatsü tendangba anogoa agiogo. Ajisüaka, tarendaktsüka, techirep atar amai kibur maliba apu amai ka kümogo. Iba apuji chirepdang shirnokang iba apuji ajanga ooya alitsü ta shisabolua bilemer. Ano, iba dang nungi tamajungba tia kaji tang Mokochung – Tuesang lenmang nung apu raksar nisungtem iba apuji ajanga mejajatetsüsa akümba tiaji asütsü. Iba apu ya alima lendong menoknok mesüra tzümetsüng agi raksatsüba masü saka tejen kuma khena anepalu mesüdangba agi raksaba dang lir. Ibajia shir apuar na (?) ta asüngdangnüsüka, saka nungdak madoker, kechiyong temetet dang, ibaji asenok meyong apu, Biswa Sarma'er apu denbo medemdangtsüla masü, aji ookra pur meyong Nagaland apu lir. Iba ama apuji Nagaland tasüng lir, iba jagi Nagaland topur jungdaktsür südi. Aji oda, apu ka anepalu mesütet raksadaktsüba agi ghonda 2 nung atongtsüba tesem ka anogo piyong jajatsüsa akümstsü. Idangji, gari nung totzü atsükba, gari rakasaba, mapang endokba, mapang memenepba aser temang timtemba takoksatemjibo yutsür, shiranger bener jajadang len tom nung süadoktsü, ano shiranger karbo tamajungba akümstsü, karbo mozü ki metongtet len tom nung tanur asotsü aser len talangba len jajar asünungji chiyongtsü aser osettsüset nung jenjang tua adoktsü. Item timtemji asenoki menokdangtetba tzü aser mopongi bener arutsüba timtem masü saka asen kija agitsü bilemba nungi poktetba ochimashi tashidak lir. Ashiko, asenoki vote aliba aser vote ayokba sen to karbo lenmang aser apu yanglutsüba sen asüba alitsüa akok, mesüra asenok lenmang aser apu melena tesem kar nung ali kimung aser kiojenang kar topur junga yanglua alitsüa akok. Shitakba agibo kija akaba agi loktiliba jenjang tajungba akümstsüla aser yimkong anisüngzüksüla saka asenokbo kija akaba agi yimkong timtemdaktsür. Ya melenshitsüla. Asen kibo chuba ki amai saka nübortem arem nema jajadaksür ta süra kechi chuba asütsü? Asenok garibo crore jenjang saka lenmangbo kor lenmang danga tamajungba ta asütsü melenbo asen meyong gariang teyarika saka lenmangbo ajem tsüka ngua tesüsü, temedem aser temerük asübasata tajungba asütsü masü na? Election nung asen kinunger vote lakh ka ana yong yoker, aji agi alia malitet, garia matu aser kia mesütet ta ser color tv ka aser mobile set tajung ka ta alir mapa meinyak itemji repranga sensaker akümstsü agibo, asenoki asen akaba aser tangatetba agi sarasadema asen nüksüng candidate ka yarir lenmang aser apu tajung nung timmedemi asen nungdak inyaka jaja tajungba asütsü masü na? Joko, asenok tulur tilar na pronglai Nagaland asoshi tamajungbo ajak inyakmaogo aser tachitsüa ajak kakshia chimar teka metongtsü dang anünga lir. Asenoki repranga lia apua ka khen, ka khen ta chireptsü, lenmanga tamajungba tamajungba akümstsü, light-a yinzü rongdang amongzuka tsüksü aser ita sena kar nem khen, kar nem khen ta magütsütet kuma aotsü. Idangji asenok kongi aotsü? Iba amaji mataloktsüsa asenok ajak melenshidi aser asen lima asoshi ochi tenla agütsüdi.

OLEMSABANG

Naga limaji Khristan lima ta alima dang mapa agi sayutsüla

~ L. Kika Pongener.

(Yashi adok nungi...)

Taküma Hornbill benjong tetsüngda nunga deobar anogo denjir, anungji anogo tepiyong mesuaka, Devotional sentep mapang Ghonda ka-ana danga, benjong sentong tarensen, tanga sentong kecha magi-i khen anena atatsüla. Aji oda, taküm deobar anogo nungji sorkar-i sentong koma yanglur aji nuburtemi tenuk yoka repranga atadi. Kanga dang tesasatsü-ka, tesuiba küm nunga, asen Naga nungger yimsusur/ketdangsertemi deobar anogo nunga, aki mapang amai dang kecha temelenshi meli-i benjong dak sentakba sentong tarensen tapu balala agiba ngua, tamangertem aika temulong kanga yirudaktsüogo. Aji oda, anogo tepiyong benjong sentong ajunga anena atatsübaji timtema ta bilemra, anogo tepiyongjisa masüyongjia, 'Devotional' sentep agiba mapang Ghonda ka-ana danga, sentong tarensen kecha magi-i anena atatsüla. Aji oda, ibajagi limapur mamangertem matsüngdang Naga limaji Khristan lima ka ta küli asüba mapa ka asütsü.

Ano iba dakji alaka, Naga limaji (Dry State)...ta alima matsüngdang yimyim ayima yur, Hornbill benjong mapang nungbo Hotel ajunga nung yi taluposa ayoktsü, amman arura kima-yimdong ajaklen yi agi meseper longsoteptsü, tsüngsangteptsü, aser asatepa rarateptsü...ta sura...!!! Iba ama lima dangji kodaser Khristan lima ka ta ajatsü...???!!! Aji oda, alima nubur matsüngdang Naga limaji 'Dry State' ta sangdongba amaji, shidakba (Reality) nung mapa agi inyaka sayutetsüla. Naga lima nungji yi ayokba 'Dokan & Hotel' ka danga malitsüla, aser kima yimdong nung yi jemer asaperanga jajar ka danga mangutsüla. Angazükba agi sorkar-i bendanger 'Foreign Tourist' benjongi arurtem atema yi Dokan kar balaka renema ayutsü lemtet...ta angazük. Aji oda, yamaji ka lemteta alinungpo...Iba mapa jagi 'Dry State' temzüngji kecha tetezü makai kumdaktsür. Naga limaji 'Dry State' lima ka asünungji, iba küli tejangja sayua...Bendanger shirnok ozü limai benjong amongtsü aser reprangtsü arur, shingaia yi bener arutsü memelar, aser ozü lima nung yi ajemtsü memelar...ta sorkar-i yimjak nung yimyim ayimoktsütsüla, aser kari aibelenra temzüng-ozüng tesashi agi merenshitsü...ta jilia osang metetdaktsütsüla. Iba amaji shidak mapa agi inyaka sayutetra, bendangertem kodang pei limai odir, parnok jagi pei lima nung oa Naga lima indang küli asütsü. Atangji, iba amaji shidak inyaktetra, Naga limaji Khristan lima ta alima dang shitakba mapa agi küli asütsü. Tema nungbo 'Dry State'...ta sangdong, saka telunglenbo 'Foreign Tourist' tenung ademmer yi dokan sunga lapoka ayu ta sura... Tsüngrem tsüngdang khuret tulu asütsü aser atakadem-ang ajangzüksü.

Ano Hornbill benjong ya tenuk amuoer rongsen yatenba mapang ka ama mekündaktsütsüla. Tetezü...tim dak alaka, talila jenjang ataker meshia rongsen bendentsüba mapang ka mekündaktsütsüla. Taxi hire, Gari para, Hotel nung chiyungba/ajemba, oset aser kechisarena nung jenjang tali-tapong memeshitsüla. Asenok shishilempabaji küm ka atema dang masü, alima mesama tashi shishilempa-a alitsü asünung, küm ka nung dang taküm tepiyong atema tajangzük angutsü bushira, asenok shishilempabaji küm ka nungji tembanga-adoktsü. Asen Naga nunggeri tzüma-longmar amai shishilempatsü mashia...ta bangpettsü amai jembibaji ibalaji mangateti shishilempaba agi jembir. Küm shia Hornbill benjong amongtsü, aser benjong amongba shiaji asenok shishilempaba mapaji maneni inyaktsü asünung, jenjangji balaka saketa tur memeshi-i, osettsüset shishirtem-ia asen osetji yokma-a ayoktsüsa jenjang (Reasonable) ataker meshitsüla, Hotel lapokertem-ia chiyungtsü nung tim dak alaka talila memeshitsüla, aser Taxi anirtem-ia jenjangji kangabo saksaka memeshitsüla. Aji oda, Naga limaji Khristan lima ka ta mapa ajunga agi külisua sayutsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Baptist Arogo ka nung pastor Brain gari lendong nung asü



Pastor, Brian E. Bartlett'er kibong noksa nung angur.

November 01, 2023: Tennessee nung aliba Baptist Arogo ka nung küm 30 dak tema pastor inyaker ka gari tsükokba lendong nung asü.

Honibar nikonngang (October 28) Memphis nung Lake Grove Missionary Baptist Church nung pastor, Brian E. Bartlett gari tsükokba lendong nung asü, ta ketdangsertemi metetdaksü.

Memphis nung aliba Greater Lakeview Baptist Church nung missionary kati sangdong ka ajanga, "Kü tembar tajung, kiyonger, Lake Grove Baptist Church nung pastor aser Khrista nung adianu, Brian Bartlett Sr. asüba osang angashia temelung raksar," ta metetdaksü.

Arogoia sangdong ka ajanga, "Bartlett ya sayutsüngeritem atema tesayur

pastor ka liasü. Pai Metro Memphis Area tesem ajaklen sayutsüngeritem nem maongka agütsü. Pa ya Kibuba atema tenyar tajung ka liasü aser onoki kanga menungratsü," ta metetdaksü.

"Onoki par kibong den mangyim jashi lemsateper aser nenok atema sarasademtsür. Tsüngeremi nenok nem tesünap agüjang ta sarasademtsür," ta kasa sangdong ajanga metetdaksü. Barlett tembar, Rev. Walter Womack-i, Barlett indang office atema furniture ka bener aruba mapang iba lendong atalok, ta metetdaksü.

Memphis nung aliba Riverside Missionary Baptist Church nung pastor, Reginald Boyce-i, "Bartlett ya janngratemtsü nisung ka liasü

aser tongti lenir ka liasü. Pai santem kanga meim aser Arogo meim. Pai lokti senden ajak nung aden aser loktiliba nung tongtibang tebilemstü onük balala atema pai inyaker," ta metetdaksü.

Osangbener den jembidang Lake Grove Baptist Arogo nung züngerem, Cortney Richardson-i, "Bartlett ya pa atema mezüngerbuba pastor liasü aser pa lanuwa mapang nunga pa pastor liasü," ta metetdaksü.

Pastor teinyakdak mapang nung Bartlett-i 2013 küm nungi 2016 küm tashi Whitehaven District Association nunga Moderator inyaka liasü. Iba organization yagi Memphis area nung aliba tanak nisungtem indang Arogotem tsüngerda amalitepa inyakerba nung yariteper.

Khristan school ka nung principal aser staff tem anema ken o benok

November 01, 2023: Uttar Pradesh nung police-i anti-conversion ozünger kübok Khristan school ka nung principal aser staff 55 anema ken o benokogo.

Uttar Pradesh nung Siddharth Nagar district kübok Bansi nung aliba Eton English Medium School nung Principal, D S Dasan aser tesayurtemi tribal lisopurtem aser Dalit nungertem Khristan yimsü dangi meyipdaksütsü meranger, ta parnok nem tai tongloksü.

October 30 nü Uttar Pradesh Prohibition of Unlawful Conversion of Religion Act, 2021 kübok Bansi police station nung parnok anema ken o benok.

Principal Dasan ya Layman's Evangelical Church nungi lir.

November 1 nü osangbener den jembidang Dasan-i, "Iba ya khenyongi taila ken o lir. Onoki shinga Khristan yimsü dangi memeyipdaksü," ta metetdaksü.

Class 8 tashi aliba Khristan

school ya küm 30 tejaklen lapok aser iba school nung tang tezüngerdak kaketshir 2,000 dak tema lir.

Paisa, "Tang mezünger onok anema tiyazü nung ken o benoker," ta metetdaksü.

October 29 (Amongnü) tekülem sentong agidang parnok tangertem Khristan yimsü dangi meyipdaksütsü meranger, ta Rakesh Kumar Gautam-i parnok nem tai tongloksü.

Paisa, principal aser tesayurtemi tekülem sentong nung adener tribal aser Dalit nungertem Khristan yimsü dangi meyipdaksütsü meranger, ta ashi.

"Taneptsü angutsü, ta shia parnok yimsü meyipdaksütsü meranger. Iba denji külemi principal aser tesayurtemi Hindu yimsü anema jembir," ta Gautam-i police nem metetdaksü.

Gautam-i, pa-a sarasadem sentong nungji aden aser pa danga Khristan yimsü dangi meyiptsü asünger dang saka pai menangzük, ta ashi.

Ajisüaka principal, Dasan-ibo, sarasadem sentong nungji Gautam maden aser pai pa den kodanga mejembidang, ta ashi.

Gautam-i pirncipal den staff tem nem tai tongloksüba sülen right-wing Hindu züngeremtemi school kimaji longkak aita liasü. Iba ken o bushisünger dangtsü atema local sub-divisional magistrate-i committee ka tentetogo.

Dasan-i, "Bushisünger dangba nungji onoki amaliteper, kechiyonger onoki mimshitsüsa kecha mali. Kobi melii ochi jungkai adoktsü," ta metetdaksü.

Principal den manager repsema inyaker, Dasan-isa district collector ajurua tatalokba ajakji lemsatepogo.

Khristan lenirtemi ashiba agi, 2017 küm nungi tenzüka Uttar Pradesh nung anti-conversion ozünger nung ajemdaker tiyazü nung Khristantem nem tai tongloksü.

India nung nütsünger teimba aliba Uttar Pradesh state nung nütsünger shilem 0.18 dang Khristantem lir.

ANOGO ABEN TSÜNGREM DEN

Taidok kü meyong

"Nisung kari kar anema tai agütsütsü lira, nenoki medemer o medemer na talangka arernzüka tai toktepanng" Kolosi 3:13

Tekümtet angutsü asoshi tematiba jenjangji temenen taidok angubaji lir. Kari Kibuba Yisu Khristaji kümtetdakba ta amanger, saka tasütsü tonga temenen taidok anguba memeteti lir asür. Tanü azüngerba Lai nung temenen taidok angutsübaji asenoki taidok agutsütsü asoshi kodaka bilema lir, iba dak aket ta sayur. Tain makümba Khristan kari asenoki teti taidok nangzükba dak keta lir ta bilemer. Ibaji Lai tesayuba süra, asenoki taidok bushiba nung mapang indoktsüla. Saka temenen shia bilemtetsüji takoktsü asü?

Kolosi 2: 13 nung temenen ajak taidok agütsüba indang ashir. Asenok temenen taidok anguba indang ashir. Asenok temenen taidok anguba tejangjatiba kuliji ibai lir. Kechiba Tsüngeremi taidok agütsür? Temenen taaji tasüba ta asenoki bilemteter. Khristai temenen taaji pa asüba ajanga ajak küpdang, shirnoki amang ajak nüji kümdaktsü. Khristaji kümtetdakba ta amangba tamang Khrista dak ayuba ajanga, Tsüngeremi taochi agi temenen ajak adoker.

Tsüngeremi Pai taidok agütsüba mebilemtetsü shimtet. Asenoki temenen bilemteta ali tashi tetsübu temenentem asenok nem bilemtetdaksütsü meranger. Taidokji Khrista dak amangba tamang nung amendaker kenyongi adoker.

Voice of the Martyrs-i 'Sejun' film saya



Bartlesville, November 01

(Agencies): International Day of Prayer for Persecuted Christians (IDOP) atongtsü mapang ana nung lia Khristan melungtet telok- Voice of the Martyrs (VoM)-i 'Sejun' ta ser feature film tatsüka sayaogo.

Iba film ya Nepali nung tebur ka Buddhist monastery ka nung aliba aser pai Yisu Khrista dak teimla tasen bushiba film lir.

'Sejun' film repringba ajanga International Day of Prayer for Persecuted Christians (IDOP) nung shilem agitsü atema nisung aika ajungmesotsü imlar, ta VoM-i metetdaksü.

IDOP anogomong ya November 5 nü amongtsü aser iba anogomong nung alima tesem balala nung reshikangshi tia nung aliba Khristantem atema sarasademtsütsü.

Nepali nung Sejun küm 9 tashi Buddhist nung monastery ka nung aliba mapang pai Buddhist yimsü nung tamajung aika ajangshi

aser pa arrshi küm 13 asüba mapang nung pai monastery ji toktsür ajener, ajisüaka par kibongi pa magizük.

Pa school-i kodanga moudang, anungji tebut pa first grade nung admission agitsü, iba school nungji Buddhist nung tesayuba agütsür. Ajisüaka school nungi tesayur kati pa den Khrista osangtajung lemsateper.

VOM indang 2023 Global Prayer Guide nung Nepal ya Khristantem anemba linük ka lir, ta zünger shia lir. Item ama linüktem nung kibong züngeremtem, kin mesüra telok balalai Khristantem anema inyaker.

Voice of the Martyrs ya 1967 küm Richard aser Sabina Wurmbrand nati tenzüka liasü. Iba organization ya denomination balala indang missions organization ka lir aser parnok alima tesem balala nung reshikangshi ajangshiba Khristantem atema inyaker.

**AO OSHI ANGAZÜKDAK:
TANÜ ANGAZÜKTSÜBA OJANG**



Saya

(v) jilushi aiba (drama)

* Lanurtemi Yisu indang saya kanga junga ia sayu.

Saya

(v) lapoktsüba (release, relax)

* Yimtak aen saya nü tesayuri kaket ka sayatsü.

OLONG PAITEP # 6683

	1			2	3			
4			5					6
					7			
	8							
	9		10			11		
					12			13
14								
					15			

TIPIEN

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsü mapang süiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

LANGTSÜNGLEN

- 1. _____ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. _____ kibur - (5)
- 13. Tebur tembar tsungda jatepba - (4)

OLONG PAITEP # 6682 TELANGZÜBA

TIPIEN :

- 1. Semtu, 3. Lepko, 5. Bilem,
- 8. Ulu, 10. Tsüngpang,
- 11. Tesangwa, 13. Aoksa,
- 15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong,
- 6. Lungkak, 7. Milak, 9. Zünga,
- 10. Temopu, 12. Walu, 14. Ali.

NAI-A YA METETTER MA

**1963 KÜM NUNGI TANG TASHI NAGALAND NUNG ANGH
(GOVERNOR) INYAKA ARURTEM YAMAI :**

1 Vishnu Sahay, ICS (Retd.)	1 December 1963-16 April 1968
2 B.K. Nehru, ICS (Retd.)	17 April 1968- 18 September 1973
3 L.P. Singh, ICS (Retd.)	19 September 1973- 9 August 1981
4 S. M. H. Burney, IAS (Retd.)	10 August 1981- 12 June 1984
5 Gen.(Retd.) K. V. Krishna Rao, PVSM.	13 June 1984-19 July 1989
6 Dr. Gopal Singh	20 July 1989-3 May 1990
7 Dr. M. M. Thomas	9 May 1990-12 April 1992
8 Loknath Mishra	13 April 1992-1 October 1993
9 Lt. Gen.(Retd.)V. K. Nayar PVSM, SM2	2 October 1993-4 August 1994
10O. N. Shrivastava, IPS (Retd.)	5 August 1994-11 November 1996
11Om Prakash Sharma, IPS (Retd.)	12 November 1996-27 January 2002
12Shyamal Datta, IPS (Retd.)	28 January 2002-2 February 2007
13K. Sankaranarayanan	3 February 2007-28 July 2009
14Gurbachan Jagat, IPS (Retd.)	28 July 2009-14 Oct 2009
15Nikhil Kumar, IPS (Retd.)	15 Oct 2009-20 March 2013
16Ashwani Kumar	21 March 2013-27 June 2014
- Krishan Kant Paul (additional charge)	2 July 2014-19 July 2014
17Padmanabha Acharya	19 July 2014-31 July 2019
18R. N. Ravi	1 August 2019-17 September 2021
- Jagdish Mukhi (additional charge)	17 September 2021-19 February 2023
19La. Ganesan	20 February 2023-

ALI AYOKTSÜ LIR

**Foothill road
nungi minute 2**

Hozukhe village

Sq ft - Rs 25

Contact:

8974869756

9612525262

AFFIDAVIT

Regd. No: 375/23

Dt. 31/10/23

1. Shri. Tekanochet S/o Late Jempanjang resident of Seiruzha Colony Ward No. 8 at Chumoukedima Town, Chumoukedima District, Nagaland do hereby solemnly affirm and declare on oath as under: -
- 1) That my name was mistakenly written as Teka Jamir in the certificate of my daughter Moala under National Institute of Open Schooling with Roll No. 14001092026 and some other documents.
- 2) That, the names Tekanochet and Teka Jamir are one and the same person of my name but my correct name is Tekanochet.
- 3) That, the contents of this Declaration are true and correct to the best of my knowledge and belief and nothing is concealed thereof.

D.K. NAGI NOTARY PUBLIC

DEPONENT

Sonia Gandhi-i Mizo nunger den tesentaktep indang jembiba

Aizawl, November 1, 2023 (Agencies): Congress parliamentary party Chairperson Sonia Gandhi-i Mizoram assembly election atema nübortem dangi video ka yanglua sayaogo.

Iba video ya Congress party indang X account nung lemsatep aser idakji Sonia Gandhi-i Mizoram nung la nija tesentaktep tajung aliba indang shia lir.

“Kü mulungjang nung Mizoram teti lir. Tesüiba mapang ni Mizoram aiben semdangogo aser nenok inyaksangshi aser sobalibatem den nür alima tobur ajung kü temulung nung teti lir. Ni nenok temeim aser keta asenba kodanga mamar. Otsüsütsü Mizo Peace Accord sign

sütepba sülen ni ozü kibong den Mizoram semdangba menungraa bilemteter” ta Sonia-i video nung shia lir.

“Mizoram, Northeast aser India ajungalen BJP aser RSS ajanga democracy atema lendong bentsür arutsü. Parnoki nübor temeyoktep mesüra democracy mesüra olemtep maginür. Parnoki India ajungalen kasa dang benshinür. Parliament nung BJP tashitem ajanga lisopurtem arem-min temetentem tashimait kümdaktsüogo aser Mizoram MP nem o mejembidaktsü” ta Congress parliamentary party chairperson-isa ashi.

“Manipur nung ita trok tashi timtema arur saka yimjung aser putepshitsü atema mapa inyakba mali. Prime Minister Narendra

Modi-i Manipur atema ola madoker aser ghonda ishika atema mesemdang” ta laisa ashi.

Laisa Mizoram nung lanurtem aser tetsürtem dang Congress nem vote enoktsütsü ayongzükogo.

“MNF aser ZPM-i parnok independent ta ashir saka parnok independent masü. Parnok ya Mizoram nung BJP atema lenmangtem lir. Congress party-i kodanga BJP den haihaura makatsü, Congress party-i dang Mizoram nung terenlok bener arutsü. Ozü sorkartem ajanga nangzükba inyaka aruogo. Anungji Mizoram nung lanurtem aser tetsürtemi tanga teloktem metendangi Congress nem vote enoktsütsü mepishir” ta Sonia Gandhi-isa ashi.

Kuki-Zo teloktemi ghonda 48 mokdangtsü ayongzükker

Imphal, November 1, 2023 (Agencies): Committee on Tribal Unity (CoTU) Sadar Hills Kangpokpi aser Kuki Students' Organization General Headquarters ajanga Manipur nung Kuki-Zo nung teimba ser aliba tesemtem nung ghonda 48 mokdangtsü metetdaktsüogo.

CoTU-i November 2 anepdang 6:00 ako nungi mokdangtsü aser KSO General Headquarters-i November 1 ayaterm nungi mokdangtsü.

Telungpurtemi special commandos ama subor Imphal-Moreh road nung aliba Sinam yimtsüng nung ki aser garitem rongdoktsüba aser tenla sen dena auyaba osang angashia temulung raksar, ta CoTU Media Cell Coordinator, Ng. Lun Kipgen-i ashi.

“Artsü anasa aliba Moreh jila nung telungpurtemi linük anema mapa inyakba atema onoki Kangpokpi district nung

November 2 anepdang 6:00 ako nungi November 4 anepdang 6:00 ako tashi mokdangtsü ayonger” ta pai ashi.

Myanmar nungi telungpurtemi ozüing alema inyaker aser Moreh nung jenoktsü meranger. Meitei telungpurtem aser Meitei forces magien tashi onoki lungkak aittsü, ta Kigpen-isa ashi.

“Union Home Minister Amit Shah-i Manipur semdangdang Moreh nungi Manipur Police Commandos ajak agientsü nangzükaka state sorkari gari 19 nung Manipur police commandos aser Arambai Tenggol anir aruba anema Manipur nung Kuki-Zo nung November 1 ayaterm nungi tengzuka ghonda 48 mokdangtsü” ta Kuki Students' Headquarters-i a metetdaktsüogo.

Police commandos-i Tengenoupal district nung Indo-Myanmar road anasa Kuki-Zo nung aliba Sinam yimtsüng nung ki aser garitem rongdoktsü, ta parnoki ashi.

Manipur Police-i tai maketba civilians dak tashiyim mapa inyakba ajanga Sinam nung noklang aika taküm kümzüktsü atema pei ki toktsür arem nung oa jenok. Iba mapang amfang nung tetsür aser tanur aika yirua liasü, ka KSO General Headquarters-isa ashi.

N. Biren Singh-i aniba sorkari Meitei nung police ketdangtsür kibong nem Rs. 50,00,000 den mapa ka agütsütsü nangzükogo. Ajisiüaka Meitei nung dak ranglokba sorkari Kuki-Zo Police Sub-Inspector Onjamang Haokip'er kibong nem tanü tashi temeten kecha magütsü lir. Onjamang ya mapa nung lia Meitei nungeri khaset, ta parnokisa metetdaktsü.

**GOVERNMENT OF NAGALAND
DIRECTORATE OF TECHNICAL EDUCATION
NAGALAND: KOHIMA
NOTIFICATION**


NO. DTE/ ESTT-2/02/2023-24/ Applications are invited from amongst the Nagaland State Entrance Exam (NSEE-2023) appeared candidates with minimum 40% marks in PCB/PCMB for ST candidates for 4-year Degree Course in B. Sc. (Hons) Natural Farming at the constituent Colleges of Central Agricultural University (CAU), Imphal for the academic session 2023-24.

Sl. No.	Name of the constituent Colleges	No. of seat allotted
1	College of Agricultural, Imphal, Manipur	01
2	College of Agricultural, Arunachal Pradesh	01
3	College of Agricultural, Kyrdemkulai, Meghalaya	01
4	College of Horticulture, Bermiok, Sikkim	01
5	College of Horticulture, Thenzawl, Mizoram	01

Total: 05

Those who had availed any State Reserved Seat are not eligible to apply. Last date for submission of application to the office of the undersigned is 14th November, 2023, till 4:00 pm.

**(Er. VIPULHOU LHOUNGU)
Director.**



Nov. 01, 2023 : Israel south tsütsü Netivot jila nung Hamas telungpuri October 7, 2023 nü amakdang rongdoker aliba gari tem Israeli security forces temi semdanga jajaba noksa nung angur. Iba lendong atalokba sülen gari tem ya Gaza arütsü anasa iba tesem nungya bendena ayu.

Ukraine-i asendenshir Crimea nung tesem balala makdar

Kyiv, Yimpoksüi/November 1 (Agencies): Ukraine-i Crimea kübok tüküm nung aliba Sevastopol yimti maneni amaktsü ta bilema Russia nung ketdangsurtemi air raid alert ka sangdonga liasü.

Iba yimti nung Bodhbar anepdang züngia siren ola agüja liasü. Crimea apu nung senzusenpong aser tzyüim nung senzusenpong ajak nokdanga liasü.

Hopta ishika tsüngda Ukraine-i Crimea kübok tesem balala maka aruba mapang ka nung iba tekümdangtsü metetdaksüogo. Kyiv indang sepaitemi iba tesem nung Russia indang air base aser Sevastopol nung Black Sea Fleet command post makogo. Russia-i tzyüim azüoker aliba tashi maitba kümdaktsütsü nükjidong nung Ukraine-i iba jenjang agia arudar.

Ukraine-i Yalta nung pro-

Russian politician Oleg Tsaryov tepsettsü merangba atema Moscow-i Mongolbarnü Kyiv aitsüogo. Crimea apu ya July ita maka liasü.

Kasa mapang nung imla aliba ama Ukraine-i Russia nung sepaitem memintoktetba atema tezü danga aliba mapang ka nung Ukraine tir Volodymyr Zelenskyy-i asükwa maru tsüngda par linük ajungmesotsü merangdar.

Ukraine-i Black Sea nung Russia nung sepaitemi tashi meiti kümdaktsüba ajanga iba rara nung takok agütsütsü imlar. Russia-i Crimea aser Black Sea amokbanger lir ta bilema raksatsüogo, ta Zelenskyy-i October 24 nü ashi.

"Russia indang (Black Sea) fleet joko Blach Sea anüolen inyaksangshi mesüteter aser Crimea nungi tanem tanemi jena odar, koba puti otsü nung

takok tulu ka lir," ta Zelenskyy-i ashi.

Iba tesem amakba ajanga Kyiv tashi taitba akümba sayur, kong naval drone tem densema lir. Kasa mapang nung Moscow-i talang nungi long-range missile aser assault drone tem amshia Ukraine kübok tesem balala maka arudar.

Taoba hopta Russia indang defence ministry-i ashiba agi, Sevastopol tüküm nung Ukraine nung indang rong asem raksatsüogo.

Ukraine-i Bodhbarnü ashiba agi, Russia-i taoba ghonda 24 tsüngda settlement 100 dak tema nung bomb pokloksüogo, koba 2023 küm anogo ka nung tesem timtiba amakba asütsü.

Maneni Hombarnü Ukraine military-i ashiba agi, parnoki naval drone aser missile tem amshia Crimea nung Russia nung indang air defence base ka takok ngua makogo.

OFFICE OF THE
DIMAPUR YIMJENKIMONGTSUR TELONGJEM
Dimapur – 797112 : Nagaland
TENÜNGSANG AGÜTSÜR

Wb. Senti Imsong aser Mrs. Onentila Longkumtsür na jabaso **Mr. Noktiensha Imsong** NPSC tatidang nung SDO (Civil) Class-1 Gazetted under Works and Housing Department nung takok anguba asoshi Dimapur Yimjenkimongtsür Telongjem ajanga tenungsang agütsür.

Tsüngremi pa taküm aser tenzüka wadang nung maneni moajang ta DYT-i sarasademtsür.

Sd/-
Wt. I. Anungla
President, DYT

Sd/-
Wt. L. Akala
General Secretary, DYT

6 Buba Supongmeren Memorial Volleyball Trophy

Venue: Molungkimong, Dist., Mokokchung
Date: 18th - 19th January, 2024
Mapang: 9:00 AM

Prizes :
Champion - Rs. 70,000/- with trophy and certificate.
Runner Up - Rs. 50,000/- with trophy and certificate.
3rd Place - Rs. 30,000/- with certificate.
4th Place - Rs. 10,000/-.

Individual Prizes :
Best Spiker - Rs. 2000/-, Best Setter - Rs. 2000/-,
Best Discipline Team etc.

Entry Fee Rs. 3000 per team. Last date for submission of forms: 16th January 2024.

Sd/-
P. Imti Aier
Convenor
(9383014469)

Sd/-
Maki Ozukum
Secretary
(7005700719)

Afghan nungertem Pak toktsür aotsü atema Taliban-i mapang talila meshi

Kabul, Yimpoksüi/November 1 (Agencies): Afghanistan nung Taliban sorkari Pakistan sorkar dang kuli kaket tejangja maliba Afghan nungertem linük toktsür aotsü atema mapang talila agütsütsü asoshi mepeshia metetdaksüogo.

Pakistan nungi mintoktsü tsüba nisung meyirejang aika arrtsü nung post tem nung adenshiba mapang Taliban-i iba temepeshiba agütsüogo.

Pakistan sorkari ashiba agi, Afghanistan nung million 1.7 Pakistan nung ozüing alema lidar aser parnok ya November 1 nü tashi nung linük toktsür mora tashiyim amshia mintoktsü.

Iba tetuyuba agütsüba sülen October tetenzük nungi tang tashi nung nisung 130,000 dak tema Pakistan toktsürogo, ta arrtsü nung amenoka aliba Pakistan nung ketdangsurtemi metetdaksü.

(Maneni tapak 8 nung...)

Jabalia refugee camp nung Israel-i nisung aika tepset

Gaza City, Yimpoksüi/November 01 (Agencies): Israel-i Gaza north tsütsü Jabalia refugee camp nung tayimtsü amshia amakdang nisung aika tepset, ta medical ketdangsur aser Palestinian ketdangsur temi ashi.

Nisung 50 dak tema tepsetogo, ta Indonesian Hospital nung director Dr Atef al-Kahlout-i ashi. Mozüki ajanga tang tashi asü-amar tejangja meshiteter, kechiaser tang tashi asü-amartem züngdangba mapang lir, ta pai ashi.

Israel-i bomb pokloksüba mapang nisung 50 dak tema takum samaogo, ta Gaza nung aliba health ministry ajanga ashi.

"Gaza north tsütsü Jabalia camp nung Israel nungeri kin ajunga samatsütsü meranga amakdang nisung 50 dak tema tepsetogo aser 150 shi yirua lir," ta health ministry sangdong ajanga ashi.

Israel mitkar ketdangsur

katia Jabalia refugee camp nung amakba indang shia liasü. "Iba tesem nung senior Hamas commander ka liasü. Onoki ibaji reprangtar aser osang tejangja sangdongtsü," ta Israel army odongtar Richard Hecht-i ashi.

Jabalia nung amakdak tangokba noksa nung nüburtem ali nung long tulu pokteta aliba müketa nokdaka liasü aser ki chireper alidak tekumzüker temi nisung takum alirtem bushia liasü.

October 7 nü Hamas teloki Israel amakdang nisung 1400 dak tema tepsetba tayang kepzüka Israel-i tayimtsü amshia bomb poklokja aser alilen nungi Gaza Strip amakdang tila-tanur 3,500 densema nisung 8,525 tepsetogo ta Palestine ketdangsur temi ashir.

Israel yagi nisung million 2.3 aliba Gaza tesem ajungalen sapanga tajemtsü tzyü, electricity, chiyongtsü aser

totzü ajunga nokdanga lir. Gaza nung nütsüng yongsük tesadang dak tema pei ki yutsür tesem balala nung prokshia lir ta United Nations ketdangsur temi ashir.

Israel-i Gaza nung alilen nungi amakba ulushia aor, kong tanks aser infantry ajanga Gaza City temeket nung Palestine telungpur den rarar.

Israel-i Gaza amakdang asürtem ya tila-tanur 3,648 aser tetsür 2,290 densema nisung 8,796 jungogo.

Nisung 22,219 shi yirua lir aser nisung 2,030 samaba osang lir, ta health ministry ajanga ashi. Tila-tanur 1,120 jana agi anembang, paramedics aser medical ketdangsur 130 tepsetogo, ambulance 28 raksaogo aser healthcare system 270 nung kongshiogo.

Mozüki 35 aliba nungi 16 nung mapa meinyakteter aser primary healthcare clinics 72 nungi 51 shibangogo.

Occupied West Bank nung

Palestine nung 128 tepsetogo aser 1,980 dak tema yirua lir.

Gaza nung raraba mechi Bolivia-i Israel den tesendaktep rakdangogo aser Latin America linük anati Tel Aviv nung aliba ambassador tem meyipa aja.

Israel mitkar temi tashiyim amshia Gaza Strip amakba aija Israel linük den tesendaktep rakdangtsü lemtetogo, ta Deputy Foreign Minister Freddy Mamani-i Mongulbar aonung osangbener dang ashi.

Minister of the Presidency Maria Nela Prada-ia Gaza-i humanitarian aid yoktsü ta sangdongogo.

"Gaza Strip nung amakba anentsü akhanger, koba ajanga civilian meyirijang aika süogo aser aika tesem balala nung prokshidakja lir," ta lai ashi.

Bolivia-i kiralongrar aser Iran nung aliba Ayatollah yimli yarir, ta Israel-i Bodhbarnü ashi.

Gaza Strip nung yimsü

asüba Hamas telokia Bolivia telemtetba pela agizük aser Arab linüktem dang Tel Aviv den tesendaktep rakdangtsü ajungshia liasü.

Kidanger linük Colombia aser Chile natia Gaza nung civilian tem tepsetba aija aser ceasefire khanga parnok ambassador tem linüki jaoka liasü.

Akhi mapang nungi Latin America nung item 'left-leaning' linük yagi Palestine nung bhukuma aru aser 'right-wing' linüktemi United States sülen anidaker.

Social media site X nung Chile Tir Gabriel Boric-i Israel aitsü aser International Humanitarian Law nung aibelenba magizüker ta ashi.

Israel nungeri Palestine nung ajunga samatsütsü meranger, ta Colombia Tir Gustavo Petro-ia aitsü.

Mexico aser Brazil densema danga Latin America linük temia ceasefire alitsü ayongzüka lir.

M DFA Trophy final Telongjem FC o Monungsang MSC na asayatsü



Telongjem FC o KSR Team na asayaba mapang

Mokokchung, Yimpoksüi/ November 1 (TYO): Tang tesayadak MDFA Trophy tanü tanabuba Semifinal asaya yaküm champion Telongjem FC o KSR Team na yangi Imkongmeren Sports Complex Mokokchung nung asayaba Telongjem-i ariana goal 1-0 agi KRS madak takok tulu nguteta final-i iogo aser Nov 3 nü Moanungsang Memorial Sporting Club den final asayatsü.

Tanü Telongjem FC o KSR Team na asayaba, mezüng asaya tesadang tashi nung telok katia goal magütsüteti goal 0-0 nung atem. Mezüng asaya tesadang tashibo ball teimbaka Telongjem-i amokbanger belentepa liasü saka parnoki goal yoktsüsa maongka tajung menguteti mezüng asaya tesadang mapangji tematok.

Asayartem anisüngzük agir külen tanabuba asaya tesadang nungbo KSR Team-a ball

possession tajungba küma kasasa toktepa asaya liasü, saka telok shingaia goal agütsütsü maongka menguteti aru. Tesü asaya tatemtsü minute ishika dang lia Telongjem nungi temelen aiter striker jersey No. 11, Shurusul Zhotso-i D-Box telung nungi goal tajung ka metsüoktsü, iba goal ji pai 87 minute nung yok aser iba goal jagi par telok final asayatsü jenjang tongdaksü.

Nov 3 nü final asaya kasa tesem Imkongmeren Sports Complex ground nung asayatsü. Tesü sabuba asaya aser asayamung shibangba sentong nikong 1:00 ako nungi tenzüka akatsü aser iba sentong nung MLA & Advisor, IPR & Soil & Water Conservation Govt. of Nagaland, Imkong L Imchen Chief Patron asütsü jaoka lir.

Nov 2 nü nikong 1:00 ako nungi tenzüka exhibition match ana asayatsü renema lir. Mezüng

match ji DC XI o MDFA XI na, aser tanabuba match ji Dimapur Ao Veteran o Mokokchung veteran na asayatsü. Iba asaya nung tejangrar aser football meimer ajak pela shishia jaoker ta MDFA ayongertemi ayongzüka metetdaksü. 2nd Semifinal asaya nung match patron Mokokchung Women Police OC, Inspector Imlichila Pongen liasü.

MDFA Trophy ya Mokokchung District Football Association-i district nung lanur football janrartem anitena parnok nem sabang lapoktsütsü mangdang yur tenzüka tanü joko küm 20 dak tali arur. Taküm iba asayamung shibai bendir champion nem lakh 2 aser runner up nem lakh 1 aser semifinal nung tsüker telok ana nema 25,000/- agütsütsü. Iba den ano nija senpet kar shimteta senpet agütsütsü tayongertem sentong lir.

7buba Late Capt N Kenguruse memorial football tourney tenzüko



Kohima, Yimpoksüi/ November 1 (TYO): Nagaland Football Association (NFA) den longjemer Assam Rifles-i ayongzüka, 7buba Late Capt N Kenguruse, MVC Memorial Football Tournament Bodhbarnü Indira Gandhi Stadium, Kohima nung tenzüko. Iba asayamung ya "pride, passion and perseverance" omen nung ajemdaker asayadar.

Ajak senteper team 15-i iba asaya nung shiilm agidar. Asayamung nung ajak senteper sen lakh 4.25 agütsütsü kong takoker nem sen lakh ana senpet

agütsütsüba densema lir. Bodhbarnü mezüngbuba asaya nung Tiema Khe Kidima-i goal 4-2 agi Lozu FC Zunhebotokokogo.

Asayamung lapokba sentong nung alakteta jaoker ama o jembiba maoang General of Assam Rifles, Maj Gen Vikas Lakhera-i, Operation Vijay mapang Capt N Kenguruse-i, Mahavir Chakra tasü ita raraba indang lemsatet aser iba sentong nung shilem agiba atema par tsürapur dang kanga pelaba lemsatetpa liasü.

Paisa, iba asayamung ayongzüka asayatsü atema Assam Rifles den longjemer

inyakba atema Nagaland Football Association dang pelaba lemsatet.

Kasa mapang nung Nagaland Football Association tir K Neibou Sekhose-i, Assam Rifles dang grassroots programme ama regimental school ajak nung "Football for School" tenzüksü mepeshi, koba AIFF tir Kalyan Chaubey-i state semdangba mapang nungshilong azüngtsüogo.

Sentong nungsa Capt N Kenguruse tebu Neiselie Kenguruse-i o tatsüka jembia aser iba asayamung ayongzüksüba atema AR dang kanga pelaba lemsatet.

2buba Peren district Volleyball asayamung tenzüko

Dimapur, Yimpoksüi/ November 1 (TYO): Peren District Volleyball Association-i ayongzüka November 1 nü Mhainamtsi Local Ground nung 2buba Peren District Inter-Village Volleyball asayamung tenzüko. Iba asayamung ya November 4 nü tashi asayatsü.

Iba asayamung nung yimtsüng balala nungi team 47-i shilem agidar, kong tebur team 30 aser tetsür team 17 densema lir.

Iba asayamung ya OSD to Deputy Chief Minister of Planning & Transformation, National Highway, Government of Nagaland, Azeu Namcyn Hau-i tenzüka liasü, shiba asayamung lapokba sentong nung alakteta jaoker liasü.

Sentong nung o jembiba mapang pai, siasapong koda tongtibang iba indang lemsatetpa den takok angutsü asoshi temulungtetba tulu alitsü nungdaker ta ashi. Azeu Namcyn Hau-isa, pa atema asayatem rongnung volleyball asaya ya tajungtiba rongnung ka lir ta shia ochishia asayatsü

asoshi asayartem ayongzüka liasü.

Maneni pai asayamung nung shilem agiba team aser talisa lanurtem dang tesendaktep tasen yanglutsü aser kati ka den tembar yimteptsü ajungshi. Iba den bendenloksema pai team tem dang iba asaya ajungkettsü asoshi teyari agütsütsü aser district aser state jenjang nungi tenzüka national aser international ta jenjang balala nung tokteptsü ajungshia liasü.

Asayamung lapokba sentong ya Adun Malangmai lenisüba nung agi, Mhainamtsi Baptist Church Pastor Peiziehube-i Tsüngrem temaotsü meshizüka sarasadem aser Kenlumyile-i ken tajung ka tena sentepa aliba lokti ajungmesoa liasü.

Sentong nungsa PDVA tir Kirangbe-i tir o jembia aser Mhainamtsi Village Council Chairman Ziudi Thou-ia o tatsüka jembia liasü. Maneni asayartem tenangzüktepba agiba sentong Adaube Mpom-i achaayanga agia liasü.

Asian Shooting Championships: Aishwary Tomar-i gold medal angu

Yimpoksüi/November 1, 2023 (Agencies): Changwon, Korea nung tang asaya aliba Asian Shooting Championship nung Bodhbarnü India nung asayar Aishwary Pratap Singh Tomar-i, tebur 50m rifle 3 positions individual event nung gold medal angu aser India team-i silver medal anguba nung teyari agütsü liasü.

Arishi küm 22 tain Tomar-i final nung point 463.5 ngua gold medal ngua liasü.

Iba asaya nung China nung asayar Tian Jiaming-i point 462.7 ngua silver medal angu aser China nungersa Du Linshu-i point 450.3 ngua bronze medal ngua liasü.

Qualification round nung Tomar-i point 591 ngua pa

pongububa nung liasü.

India nung asayar Tomar, Swapnil Kusale aser Akhil Sheoran nung senteper point 1764 ngua parnok team asaya nung China (1777) sülen tanabuba jenjang nung tembanga silver medal ngua liasü.

Iba asaya nung Kusale aser Sheoran na ajanga India-i Olympic quota ana angutsü aliba nungi anaprongla nguteter liasü.

Kusale-i taoba küm Cairo nung World Championships asayaba mapang Paris Games atema quota angu aser kasa küm Sheoran-ia, Baku nung World Championships asayaba mapang Paris Olympics atema quota nguteta liasü.

Afghan nungertem Pak... (Tapak 7 nungi...)

Afghanistan nung küm aika mepetmesü tulu adoker aliba mapang linük toktsür jena aoer Afghan nung million aika jenokdaksüba atema Taliban sorkari Pakistan aser tanga linüktem dang kanga pelaba lemsatet.

Ajisüaka Mongolbarnü menor sangdong ka ajanga parnoki, osang agütsür mapang tatsüka tsüngda Afghan nungertem tashiyim agi memintoki parnok renemtsü atema mapang agüjang ta mepeshia metetdaksüogo.

Sorkar kümteba sülen

Taliban sorkari Afghan nungertem dang kidangi meyipa arutsü mepeshia arudar, aser kasa mapang nung Pakistan-i iba jenjang agiba aitsüogo aser ashiba agi, Islamabad aser Kabul na mangatetep adokba ajanga lisopurtem merenshir.

Pakistan nung tesem balala amakba tali küma aoba sülen Pakistan-i ashiba agi, bendangertem mintokba ya parnok kümzüka ayutsü asoshi lir. Tesem balala amakba ya sorkari Afghanistan nung amendaker aliba telungpurtem dang tai tonglojka arudar.

BILEMDANGANG

"Bilemdanga inyakba ajanga aibelen aika nungi jenbor."